



Reykjavík, 14. febrúar 2019
R19010428
600
HBL/óm

Umhverfis- og skipulagssvið

Borgartúni 12-14
105 REYKJAVÍK

Tillaga borgarfulltrúa Samfylkingarinnar, Viðreisnar, Pírata og Vinstri grænna um mat á vinningstillögu um almenningslistaverk í Vogabyggð

Á fundi borgarstjórnar þann 5. febrúar 2019 var svohljóðandi tillaga borgarfulltrúa Samfylkingar, Viðreisnar, Pírata og Vinstri grænna samþykkt:

Lagt er til að mat verði lagt á raunhæfni og rekstrarkostnað listaverksins Pálmar eftir listakonuna Karin Sander sem hlutskarpast var í alþjóðlegri listaverksamkeppni um ný almenningslistaverk í Vogabyggð.

Það tilkynnist hér með. Greinargerð fylgir tillögunni.

Borgarfulltrúar Miðflokksins og Flokks fólksins sátu hjá við afgreiðslu málsins.

Borgarfulltrúar Samfylkingarinnar, Viðreisnar, Pírata og Vinstri grænna lögðu fram svohljóðandi bókun:

List í almannarými er öllum borgum afar mikilvæg. Vel heppnuð listaverk í almannarýmum geta brotið upp hversdaginn og skapað líflegar umræður. Tekjur borgarinnar af gatnagerðargjöldum og byggingarréttargjöldum og nú síðast innviðagjöldum hafa og munu fara til gatnagerðar, stíga, lýsingar, grunnskóla, leikskóla og annarra nauðsynlegra innviða auk listar. Alls mun borgin hafa um sex milljarða í tekjur af Vogabyggð en mun um leið fjárfesta a.m.k. öðru eins til þessara innviða í hverfinu. Hin alþjóðlega samkeppni sem fram fór í tengslum við uppbygginguna í Vogabyggð er einstök á landsvísu. Virt listakona bar sigur úr býtum en eins og alltaf þegar listaverk eða önnur mannanna verk koma til framkvæmda, þarf að meta hvort framkvæmdin sé raunhæf og hver rekstrarkostnaðurinn er.

Borgarfulltrúar Sjálfstæðisflokks lögðu fram svohljóðandi bókun:

Sjálfstæðisflokkurinn fagnar því að listaverkið Pálmar sé endurmetið með þeim hætti

sem lagt er til, enda lagði Sjálfstæðisflokkurinn til í borgarráði í síðustu viku að þessi ákvörðun dómnefndar yrði endurmetin. Þeirri tillögu Sjálfstæðisflokks var frestað en hæglega hefði verið hægt að taka hana til meðferðar og afgreiðslu. Ekki liggur fyrir í þessu tilfalli hver ber ábyrgð á umframkostnaði við verkið í Vogabyggð. Þá er ljóst að kostnaðurinn er fjármagnaður með hærri lóðagjöldum sem hefur í för með sér hærri íbúðaverð en kostnaðurinn við verkið nemur um 100.000 kr. á hverja íbúð í hverfinu. Þá vekur athygli að Reykjavíkurborg ver um 16 milljónum kr. árlega í listaverkakaup en hér er um tíu sinnum hærri upphæð að ræða.

Borgarfulltrúi Flokks fólksins lagði fram svohljóðandi bókun:

Lagt er til af meirihlutanum að „leggja eigi mat á vinningstillögu um listaverkið í Vogabyggð.“ Borgarfulltrúa Flokks fólksins finnst það hjákátlegt að einungis sé verið að tala um að leggja „mat á raunhæfni“ vinningstillögunnar. Ekki er betur séð en almenningur og fjöldi sérfræðinga hafi nú þegar lagt mat á þetta verk og allt í sambandi við það. Það sem borgarmeirihlutinn þarf að gera er að hverfa frá þessu verkefni/ákvörðun umsvifalaust enda er hugmyndin arfavitlaus í víðum skilningi. Fyrst og fremst eru pálmatré, eins og þau sem sýnd eru á vinningstillögunni, plöntur sem þurfa ljós og nokkuð háan hita allt árið. Þetta eru hitabeltisplöntur þar sem 12 tíma dagur er og 12 tíma nótt. Hér er allt önnur ljóslota sem hitabeltisþálmur eru ekki lagaðir að. Pálmi er planta sem á ekki heima hér. Til að aðlaga ljóslotu að þessum plöntum, þarf að lýsa að vetri til og myrkva á sumrin. Með lýsingu og hitun að vetri til myndast móða innan á glerhjúpnunum, nema að það sé hindrað með einhverjum kostnaðarsömum aðgerðum svo sem þreföldu gleri og loftblæstri. Annað sem nefna má í þessu sambandi er að þá daga sem glerið er hreint er það lítt sýnilegt fuglum og þeir munu því fljúga á það þegar þeir ætla að setjast í tréð og margir þeirra rotast.

Borgarfulltrúi Miðflokksins lagði fram svohljóðandi bókun:

Meirihlutinn er kominn í öngstræti með exótíska listaverkið í Vogabyggð sem dómnefnd taldi óvænt, skemmtilegt og djarft. Því hefur verið haldið fram síðan listaverkið Pálmatré var kynnt að það verði fjármagnað með innviðagjöldum sem fást með uppbyggingu Vogabyggðar. Það er rangt því svokölluð innviðagjöld, sem margir telja ólögmæt, standa einungis undir helmingi kostnaðar. 70 milljónir munu koma beint frá útsvarsgreiðendum. Það er forkastanlegt að ekki skuli vera búið að kanna rekstrarkostnað á verkinu áður en það var valið. Á það skal bent að borgin er komin út í horn því tæpast er hægt að hætta við verkið nema að skapa höfundinum skaðabótarétt.

Helga Björk Laxdal

e.u